



Komunikadu Imprensa
03 Dezembru 2013

Tribunál kondena pena prizaun efetiva tinan 2 fulan 6 Pasu progresu ida iha aspetu implementasun Lei Kontra Violénsia Doméstika

Iha 27 Novembru 2013, Tribunál Distritál Dili lee leitura akordaun ba kazu maus tratus ba kónjuje no konklui ho pena prizaun efetiva tinan 2 fulan 6 ba arguidu JS ne'ebé komete krime maus tratus ba kónjuje, iha Distritu Dili.

Ministériu Públiku akuza katak iha tinan 2001, arguidu baku lezada. Hahalok hanesan mos akontese iha tinan 2007 no 2008. Tuir mai, iha 31 Dezembru 2009, arguidu kaer lezada nia kakorok riba tun ba rai. Aktu hanesan repete hikas fali iha 15 Abril 2010, iha oras tuku 10:00 dader.

Iha 04 Maiu 2010 arguidu tuku dala ida iha lezada nia hasan sorin karuk no foti tudik hodi ameasa atu sona mate.

Tuir mai iha 14 no 23 Feveireiru 2012, arguidu ameasa atu oho, trata aat/insulta lezada dehan feto buan, puta moe laiha no duni sai husi uma. Depois iha 11 no 21 Marsu 2012, arguidu kontinua repete hahalok hanesan ba lezada, nune'e lezada senti la aguenta ho hahalok arguidu nian no decide ba hela ho ninia família.

Iha 16 Jullu 2012 oras tuku 07:00 dader arguidu tuir ba trata ho liafuan aat no abuza lezada. Nune'e mos iha 17 Jullu 2012 oras tuku 09:00 dader arguidu tuku dala rua iha parte ulun no kontinua trata aat lezada. Konsekuensia husi arguidu nia hahalok ne'e rezulta lezada hetan moras iha isin lolon no halo tratamentu mediku iha ospital. Alende ne'e, lezada sente trauma tan hetan insulta ameasa atu sona mate.

“JSMP apresia desizaun tribunál iha kazu ida ne'e. JSMP hanoin katak pena prizaun ba krime ne'e justu no apropiadu ho arguidu nia hahalok tomak durante ne'e. Kondensasun ho pena efetiva manifesta tribunál nia obriagsaun atu prevene krime ho natureza violénsia doméstika akontese hikas iha futuru.”, dehan Diretór Ezekutivu JSMP Luis de Oliveira Sampaio.

JSMP hein katak desizaun ne'e bele sai hanesan referensia ba kazu maus-tratus ba konjuje ka forma krime ho natureza violénsia doméstika sira seluk, ne'ebé rekere kondensaun prizaun efetiva, atu produz efeitu disuasivu (*efek jeral*) no prevene insidénsia violénsia doméstika iha futuru.

Ministériu Públiku akuza arguidu nu'udar autór materiál ba krime ne'ebé preve iha artigu 154 Kódigu Penál kona-bá maus tratus ba kónjuje no artigu 157 Kódigu Penál kona-bá krime ameasa no konjuga ho artigu 35 Lei Kontra Violénsia Doméstika.

Iha audiénsia, arguidu mos konfesa ba tribunál katak faktus sira ne'ebé konsta iha akuzasaun Ministériu Públiku nian los. Lezada no testamuña nia depoimentu ba tribunál reforsa katak arguidu komete duni hahalok sira ne'e ba lezada.

Bazeia ba ba faktus ne'ebé produs iha audiénsia julgamentu, tribunál konklui hodi aplika pena prizaun efetiva (pena ba prizaun) tinan 2 fulan 6 ba arguidu.

Kazu ne'e rejista ho numeru prosesu: 25/2013/TDD. Julgamentu ba leitura akordaun prezide husi juiza Dra. Zulmira da Silva (representa juiz kolektivu). Ministériu Públiku representa husi Dr. Jacinto Babo. Arguida hetan defeza husi Dr. Amado de Almeida (substitui) husi Eskritóriu Defensória Públiku.

Atu hetan informasaun kompleitu, favor kontaktu:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
info@jsmp.minihub.org
Telefone:3323883 |
Website: www.jsmp.tl
Face book: www.facebook.com/timorleste.jsmp
Twitter: @JSMPtl